

Tuzla, 11.11.2024
Br. protkola: KP-I-528/24
Br. Javnog poziva: 12-FVSG-2/2024

CILJEVI I KRITERIJI ZA DODJELU GRANTOVA U OKVIRU FONDA „VOLIM SVOJ GRAD“

Fond „Volim Svoj Grad“ usmjeren je na podršku građanima, udruženjima i institucijama sa područja Tuzlanskog kantona, koji imaju želju da se uključe u razvoj svoje lokalne zajednice, imaju ideju kako da riješe ključne probleme u svojoj lokalnoj zajednici i rade na uspostavljanju partnerstva sa poslovnim i javnim sektorom kroz realizaciju građanskih inicijativa i projekata. Podrška iz ovog fonda realizuje se u okviru Programa razvoja zajednice koji podstiče građanski aktivizam i podržava ideje i inicijative koje će doprinijeti poboljšanju uslova življenja, podstaći na volonterizam i animirati građane da se uključe u razvoj zajednice i civilnog sektora.

CILJEVI FONDA:

- Povećanje učešća građana u razvoju zajednice na području svih gradova/općina Tuzlanskog kantona;
- Poboljšanje uslove življenja u lokalnim zajednicama u TK;
- Jačanje civilnog sektora i kapaciteta lidera u civilnom sektoru u TK;
- Uspostavljanje međusektorskih partnerstava i promovisanje važnosti uloge civilnog sektora i građanskih inicijativa u razvoju zajednice.

PODRUČJE DJELOVANJA

Program za razvoj zajednice Fondacija tuzlanske zajednice provodi na području Tuzlanskog kantona.

KO MOŽE APLICIRATI?

1. Registrovane organizacije i udruženja sa područja Tuzlanskog kantona;
2. Javne institucije sa područja Tuzlanskog kantona (biblioteke, obdaništa, škole, formalno registrovane mjesne zajednice, itd)
3. Neformalne grupe građana od minimalno 5 aktivista, sa najmanje 3 punoljetna člana sa područja Tuzlanskog kantona

ŠTA PODRŽAVAMO?

- Inovativne projekte iz različitih područja društvenog života koji odgovaraju na potrebe lokalne zajednice i kojima se direktno unapređuju uslovi življenja u Tuzlanskom kantonu;
- Projekte koji promovišu građanski aktivizam i volonterizam i zasnovani su na volonterskom angažmanu aplikanata i promociji međusektoralne saradnje;
- Projekte koji su usmjereni na rješavanje konkretnog i prioritetnog problema u lokalnoj zajednici ili zadovoljenje određene potrebe u zajednici;
- Projekte koji pokazuju vidljivu saradnju i podršku lokalnih partnera u zajednici - posebno lokalnih vlasti, ali i poslovnih subjekata, udruženja, pojedinaca, javnih institucija itd.

Shodno rezultatima istraživanja [Vitalni znaci 2019.](#), prednost dajemo projektima koji su usklađeni sa prioritarnim potrebama lokalnih zajednica u Tuzlanskom kantonu, te izazovima na globalnom nivou definisanim [UN Globalnim ciljevima održivog razvoja](#). U okviru ovog Fonda, želimo podržati projekte koji potiču inovativna međusektoralna partnerstva i koji će unaprijediti slijedeće oblasti življenja:

- **Očuvanje prirode, briga o okolišu i klimi**

Želimo da podržimo inicijative koje su usmjerene na brigu o okolišu i koje podstiču odgovoran odnos prema prirodi, brigu o čistoći vode, zemlje i zraka. Dobrodošli su projekti za unapređenje kulture zdravog življenja kroz sprječavanje onečišćenja okoliša, recikliranja, održivog korištenja javnih površina i prirodnih resursa.

- **Kvalitetno obrazovanje i cjeloživotno učenje**

Želimo da podržimo inicijative kojima se promoviše cjeloživotno učenje i neformalno obrazovanje, ali i koje njeguju kulturu zajedništva i poštovanje različitosti. Dobrodošli su projekti edukativnog karaktera za usvajanje novih životnih vještina i znanja kod svih kategorija stanovništva, bez obzira na različitosti, npr. opismenjavanje, učenje starih zanata, kućne radinosti, proširivanje znanja o njegovanju kulture različitosti, tradicije i slično.

- **Smanjenje nejednakosti i ljudska prava**

Želimo da podržimo organizacije i neformalne grupe koje aktivno rade na razvoju demokratskog društva, promovišu rodnu ravnopravnost, zajedništvo i društvenu koheziju. Dobrodošli su projekti zagovaranja i promocije ljudskih prava, rodne ravnopravnosti, prava manjina, prava ranjivih i marginaliziranih grupa, npr. javne kampanje, debate, okrugli stolovi, diskusije i druge aktivnosti usklađene sa potrebama navednih grupa.

- **Ekonomija i poduzetništvo**

Inovativne projekte koji su usmjereni na razvoj poduzetničkog duha i projekte koji obezbjeđuju samoodrživost organizacijama civilnog društva. Projekte koji podstiču usvajanje vještina i kompetencija potrebnih na tržištu rada, koji su usmjereni na unapređenje rada organizacija civilnog društva i sl.

- **Očuvanje zdravlja, sport i rekreacija**

Podržavamo aktivnosti za mlade, djecu i porodicu, takmičenja i male turnire između kvartova i lokalnih zajednica, promocije zdravog načina života i omasovljavanje rekreativnog sporta među djecom i mladima. Prednost će se dati inovativnim idejama koji će promovirati rekreativni sport, što ne podrazumijeva podršku trenažnom procesu profesionalnih sportskih klubova i njihovih omladinskih pogona.

- **Kultura, umjetnost i društveni život**

Podržavamo kulturna dešavanja, izložbe, festivale, koncerte, umjetničke predstave, tematske večeri i slično. Prednost će se dati inovativnim idejama, što ne podrazumijeva godišnje koncerte, niti obljetnice i proslave godišnjica.

- **Podrška mladima, djeci i porodici**

Želimo podržati preventivne projekte u zajednici koji će mladima pružiti adekvatnu pomoć i podršku, ali i uticati na stvaranje opšteg osjećaja sigurnosti. Projekte i aktivnosti vezane za prevenciju vršnjačkog nasilja, sigurnost u saobraćaju - naročito se odnosi na aktivnosti podizanja svijesti građana o važnosti poštovanja zakona i pravila sudjelovanja u saobraćaju (podići svijest o posljedicama brze i neprilagođene vožnje, vožnje u alkoholiziranom stanju, i sl.)

Projekti mogu biti i iz drugih oblasti, pri čemu prethodno navedene imaju prednost.

OPŠTI KRITERIJI:

- Projekti moraju **trajati duže od 1 mjesec**;
- Implementacija projekata mora biti **završena najkasnije do 31.07.2025.godine**, bez mogućnosti produžetka za utrošak sredstava ili završetak projektnih aktivnosti nakon navedenog datuma;
- **Minimalna vrijednost** tražene podrške/granta je **4.000,00KM (bez PDV-a)**;
- **Maksimalna vrijednost** tražene podrške/granta je **10.000,00KM (bez PDV-a)**;
- **Učešće aplikanta u projektu** mora iznositi **najmanje 30% od vrijednosti potraživanog iznosa**. Učešće može biti u novcu, u opremi, robi i uslugama, te učešće kroz volonterski rad (vrijednost učešća u robi, opremi i uslugama, te učešća kroz volonterski rad mora biti izražena u novčanim jedinicama i jasno opisana u projektnoj aplikaciji);
- Aplikanti mogu **aplicirati samo sa jednim projektnim prijedlogom** na ovaj poziv.

SPECIFIČNI KRITERIJI

- Projekti treba da budu zasnovani na volonterskom angažmanu aplikantata i promociji međusektoralne saradnje;
- Prednost će se dati projektima koji imaju dugoročniji efekat u lokalnoj zajednici i dobru šansu da postanu samoodrživi i nakon završetka projekta, te projektima u kojima je vidljiv kontinuiran rad i provedba aktivnosti organizacije na sedmičnom, mjesečnom i godišnjem nivou;
- Projekti treba da pokažu vidljivu saradnju i podršku lokalnih partnera u zajednici (posebno lokalnih vlasti, ali i poslovnih subjekata, udruženja, pojedinaca, javnih institucija itd.). Poželjno je da aplikanti dostave potvrdu da će općina/grad i/ili drugi akteri sudjelovati u realizaciju projekta.
- Prednost dajemo projektima koji uključuju veći broj građana iz lokalne zajednice u realizaciju projekta
- Projektni tim treba biti sastavljen od minimalno 5 aktivista, ali će se prednost dati projektima koji uključuju veći broj učesnika;
- Neformalne grupe moraju imenovati 3 punoljetne osobe koje će preuzeti punu odgovornost za realizaciju projekta;
- **Potraživanje grant sredstava za organizacijske troškove ne smije prelaziti 20% vrijednosti traženog granta.** Organizacijski troškovi podrazumijevaju naknadu za usluge koordiniranja projekta, troškove prevoza i druge operativne troškove koji glase na ime organizacije (računovodstvo, bankovna provizija, troškovi režija i slično);
- Neformalne grupe ne mogu potraživati sredstva za organizacijske troškove;
- **Potraživanje grant sredstava za nabavku opreme ne smije prelaziti 30% vrijednosti traženog granta** (pod opremom se podrazumijevaju svi artikli minimalne vrijednosti 200,00KM, a čiji vijek trajanja/upotrebe je duži od godine dana);
- Troškovi projekta ne mogu uključivati najam opreme od neregistrovane kompanije ili od fizičkih lica;
- Neformalne grupe koje kroz projekat nabave opremu, dužne su svu kupljenu opremu donirati lokalnoj organizaciji ili instituciji po završetku projekta;
- Ukupna vrijednost projekta ne smije biti veća od 20.000,00KM;
- Grant sredstva se neće dodijeliti za projekat koji je ranije bio podržan, osim u posebnim slučajevima kada komisija procijeni da projekat ima dugoročan efekat, te da se njime rješava neki od prioritarnih problema u zajednici;
- Prednost će se dati manjim organizacijama i aplikantima koji do sada nisu dobili grant od Fondacije.
- Prednost će se dati organizacijama koje nemaju trenutno aktivan projekat podržan od strane Fondacije.

ŠTA NE MOŽEMO PODRŽATI?

- Projekte koji za cilj imaju **isključivu investiciju u infrastrukturu i/ili renoviranje** - putevi, zgrade ili drugi objekti, mostovi, postrojenja za pročišćavanje vode i vertikalne strukture kao što su saobraćajni znakovi, ulična rasvjeta i sl., iskopavanje, korištenja bagera i sličnih mašina;
- **Projekte kojima se planira izgradnja novih infrastruktura** - izgradnja igrališta, postavljanje novih sprava za vježbanje, klupa i sl. (možemo podržati zamjenu i renoviranje postojećih, za koje nisu potrebni građevinski radovi)
- Projekte koji za cilj imaju **isključivo poboljšanje ili promjenu postojeće nekretnine** kako bi se omogućila njena dalja ili učinkovitija upotreba unutar predviđene svrhe ili uređenje za promjenu namjene, te kojima se mijenja vanjski izgled objekta (možemo podržati nestrukturane kozmetičke radove koji uključuju bojenje, krečenje, podove, zidne obloge, postavljanje polica, itd., ali samo ukoliko je to neophodno za realizaciju daljih projektnih aktivnosti);
- Projekte koji za cilj imaju **isključivo poboljšanja ili nadogradnju mehaničkih, električnih ili drugih građevinskih sistema** (možemo podržati zamjenu već postojeće rasvjete, bez zamjene vertikalnih konstrukcija);
- Projekte koji za cilj imaju lične koristi pojedinca;
- Projekte koji podrazumjevaju otplate dugova ili kredita;
- Projekte koji su već odrađeni ili se radi o retroaktivnim zahtjevima;
- Projekte usmjerene na godišnje finansiranje rada udruženja/grupe;
- Projekte usmjerene isključivo na druženja članova neke grupe ili udruženja;

- Projekte usmjerene isključivo na troškove putovanja, smještaja, putarine, ekskurzija i sl.;
- Projekte usmjerene na pokrivanje troškove učešća na edukacijama za pojedince ili članove udruženja;
- Projekte koji na bilo koji način štete okolišu (u skladu s tim želimo skrenuti pažnju aplikantima da prilikom kreiranja projektne aplikacije vode računa da će morati koristiti biorazgradive materijale koji ne predstavljaju opasnost za okoliš i živi svijet, te shodno tome planirati budžet);
- Projekte dodjele humanitarne pomoći;
- Potraživanja za nabavku osnovnih sredstava rada;
- Pokrivanje troškova magistarskih i doktorskih radova;
- Nabavku oružja (u bilo kojem obliku, bez obzira da li se radi o sportsko/rekreativnom, replikama i sl.);
- Projekte usmjerene primarno za unapređenje religije i politike;
- Projekte političkih partija ili njihovih ogranaka;
- Projekte vjerskih institucija ili organizacija;
- Zahtjeve za sponzoriranje, reklamiranje, podršku događajima za namicanje sredstava i velike zahtjeve za sredstvima;
- Redovne trenajne procese sportskih klubova i/ili putovanja;
- Kotizacije i troškove takmičenja u ligama;
- Zahtjeve od velikih dobrotvornih društva (izuzev kada lokalni ogranak, koji ima odvojeni organ upravljanja, implementira nezavisnu aktivnost za dobrobit zajednice);
- Projekte koji za cilj imaju isključivo plaćanje honorara za trenere ili druge osobe angažovane po projektu;
- Projekte koji su primarno usmjereni na ostvarivanje profita;
- Troškove isključive registracije novog udruženja (osim u slučaju kada neformalna grupa kroz realizaciju projekta želi osnovati novo udruženje);
- Projekte koji promovišu nasilje, mržnju ili bilo koji vid diskriminacije;
- Projekte koji u svojim aktivnostima imaju uređenja i renoviranja spomen obilježja, groblja i mezarja;
- Troškove kupovine alkoholnih pića i duhanskih proizvoda;
- Projekte koji se realizuju izvan Tuzlanskog kantona.

KAKO APLICIRATI?

- Savjetujemo vam da unaprijed promislite o vašoj aplikaciji i kreirate Word dokument aplikacije prije online apliciranja. Možete skinuti Word obrazac aplikacije sa linka: [Word aplikacija za projekte \(fondacijatz.org\)](http://fondacijatz.org), te njega koristiti;
- Ukoliko budete podržani, za sve aktivnosti planirane da se realizuju u školi ili drugoj odgojno-obrazovnoj ili javnoj ustanovi, biti će potrebno da, prije početka implementacije projekta, dostavite odobrenje/saglasnost odgovornog lica te ustanove. Savjetujemo vam da pribavite „načelno“ odobrenje/saglasnost što prije, kako bismo izbjegli eventualna kašnjenja u realizaciji projekta ili otkazivanje samog projekta
- Prije kreiranja budžeta projekta savjetujemo vam da se detaljno raspitate za cijene roba i usluga koje planirate nabaviti kroz projekat, kako bi traženi iznosi za pojedine stavke bili što približniji cijenama na tržištu.
- Početak projektnih aktivnosti možete planirati najranije 30 radnih dana od datuma zatvaranja ovog javnog poziva, jer će Komisija za odabir projekata donijeti odluku u periodu od maksimalno 30 radnih dana od dana zatvaranja poziva (zbog procedura donatora, može se desiti da odluka bude objavljena i kasnije, u slučaju čega će se morati pomjeriti i datumi implementacije planiranih projektnih aktivnosti);
- Budite slobodni kontaktirati osoblje Fondacije ukoliko vam je potrebna podrška prilikom razrade ideje i/ili ispunjavanja online aplikacije putem telefona [035/362-830/831](tel:035362830831) i [061/206-935](tel:061206935) ili putem mail-a: inicijative@fondacijatz.org sa naznakom „Fond za mlade“

- **Projektni prijedlog se podnosi isključivo putem [platforme za online apliciranje \(fondacijatz.org\)](http://fondacijatz.org) koja se nalazi na web stranici Fondacije tuzlanske zajednice;**
- Ukoliko imate poteškoća sa apliciranjem on-line putem, molimo vas da kontaktirate osoblje Fondacije, kako bismo zajednički našli rješenje;

NAPOMENA:

Prilikom izrade projektnog prijedloga pažljivo pročitajte kriterije i vodite se Uputstvom za popunjavanje aplikacije koje također možete preuzeti na našoj web stranici: [Fond Volim Svoj Grad – početna \(fondacijatz.org\)](http://fondacijatz.org).

Jasni, precizni i kvalitetno ispunjeni projektni prijedlozi, sa logički povezanim elementima projektnog prijedloga, osnova su za dobro razumjevanje vaše projektne ideje i eventualnu podršku.

Navedeni kriteriji su usklađeni sa Strateškim planom 2020-2024 Fondacije tuzlanske zajednice i zahtjevima donatora Fonda.



Jasna Jašarević,
direktorica Fondacije tuzlanske zajednice